



Program **BICARA SISWA**

KEMERDEKAAN
MALAYSIA



APA KAT.
GEN Y

12 September 2014 Jumaat 8:00 mln. - 11.30 mln

Panggung Perubahan, Universiti Putra Malaysia



Oleh Sarah Aina Shawal
sarah.aina@bh.com.my

Serdang

(Dari kiri) Tamilarasi, Muhammad Syafiq, Prof Turiman, Hamk Adz Dzikree dan Tian Wong **ketika sesi program berlangsung.**

Kemerdekaan dari kaca mata **Gen Y**



Kebijaksanaan mencari titik persamaan yang dapat merapatkan jurang perbezaan dalam masyarakat berbilang latar belakang, termasuk keupayaan untuk bertolak ansur dan saling menghormati, dikenal pasti antara faktor perwujudan keharmonian rakyat di negara unik seperti Malaysia.

Demikian rumusan dicapai pada Program Bicara Siswa bertajuk 'Kemerdekaan Malaysia ke-57: Apa Kata Gen Y?' yang berlangsung di Universiti Putra Malaysia (UPM) di sini, baru-baru ini, dengan dipengerusikan oleh Prof Dr Turiman Suandi dari Jabatan Pemajuan Profesional dan Pendidikan Lanjut, Fakulti Pengajaran Pendidikan, dan dibarisi panel terdiri daripada empat pelajar universiti itu.

Pelajar berkenaan ialah Yang Dipertua Majlis Perwakilan Pelajar (MPP) UPM, Muhammad Syafiq Ramli; pelajar Bacelor Sains (Pembangunan Manusia), Hamk Adz Dzikree

Abdul Sukor; Ling Tian Wong (Bacelor Pendidikan - Pengajaran Bahasa Malaysia sebagai Bahasa Pertama) dan Tamilarasi a/p Manium (Bacelor Pembangunan Manusia dan Pengurusan).

Hamk Adz Dzikree berkata, bagi mencapai titik persamaan dalam perbezaan, masyarakat majmuk di Malaysia perlu mengenali antara satu sama lain terlebih dahulu bak kata pepatah 'tak kenal maka tak cinta'.

"Sebagai contoh, saya yang berbangsa Melayu dan rakan Cina serta India mempunyai cita rasa juadah pilihan masing-masing seperti nasi lemak, roti canai dan yong tau fu, tetapi kami mempunyai persamaan tujuan makan untuk kenyang," katanya.

Semangat cinta akan negara

Tamilarasi pula berpendapat bahawa setiap warganegara berperanan penting menyemaikan semangat kecintaan terhadap negara dalam jiwa

mereka dengan mematuhi Perlembagaan dan undang-undang.

Selain itu, beliau berkata, mereka juga perlu menggunakan kemajuan teknologi maklumat (IT) secara bertanggungjawab dengan menjadikannya medium berkesan untuk kebaikan.

"Aplikasi seperti WhatsApp, Twitter, Instagram, Telegram dan WeChat yang menjadi perhatian generasi Y dalam kehidupan harian kini, harus menjadi medium perantara masyarakat supaya cakna dalam isu semasa ekonomi, sosial serta politik," katanya.

Tian Wong berkata, kemudahan mendapatkan ilmu hanya 'di hujung jari' dalam arus kemodenan sekarang harus dimanfaatkan ke arah mencapai matlamat Malaysia menggapai status negara maju menjelang tahun 2020.

"Sebagai contoh, mahasiswa berkemahiran dalam bidang sains mampu melakukan pengubahsuaian dan inovasi baharu yang dapat menyumbang ke arah pembangunan masyarakat," katanya.



Ibrahim (empat dari kiri) diiringi Prof Mohammad Shatar (dua dari kanan)
beramah mesra dengan pelajar.

Syafiq berkata, aspek kepemimpinan juga perlu diberi penekanan penting dalam mengisi kemerdekaan negara.

Dalam konteks ini, beliau berkata, generasi Y harus memikul tanggungjawab kepemimpinan sebagai amanah yang perlu diurus dan dilaksanakan secara terbaik, bukan untuk tujuan berbangga semata-mata.

"Seseorang pemimpin harus bersifat pendidik dan menjadi teladan, bukan sekadar hebat berkata-kata," katanya.

Kira-kira 500 pelajar memeriahkan Program Bicara Siswa itu yang dirasmikan oleh Ketua Pengarah Penerangan, Datuk Ibrahim Abdul Rahman, selain turut dihadiri Timbalan Naib Canselor (Hal Ehwal Pelajar dan Alumni) UPM, Prof Dr Mohammad Shatar Sabran.

Sementara itu, Ibrahim dalam ucapannya berkata,

pengaruh program itu bertujuan menyelami perspektif dan pandangan generasi Y untuk sama-sama menyumbang ke arah kemajuan negara.

"Program ini penting bagi membolehkan mereka menyuarakan pandangan secara terbuka dan juga cadangan bagi menjadikan Malaysia sebuah negara Islam maju pada masa depan," katanya.

Teruskan legasi

Prof Mohammad Shatar pula berkata, nikmat kemerdekaan yang dikehendaki rakyat sejak 57 tahun lalu hasil pengorbanan pemimpin terdahulu, justeru generasi pelapis harus mempertahankannya daripada sebarang ancaman.

Beliau berkata, golongan muda perlu meneruskan legasi kecemerlangan, kemajuan serta keamanan Malaysia, termasuk mengambil contoh dan ikhtiar kejadian di negara lain.

"Jika generasi hari ini mengambil langkah yang salah, tidak mustahil suatu ketika nanti negara akan mengalami kemasuhan dan kehancuran dalam sekilip mata seperti berlaku di beberapa negara lain," katanya.



Pelajar yang menghadiri Program Bicara Siswa bertajuk 'Kemerdekaan Malaysia Ke-57: Apa Kata Gen Y?'